

Powšitkowne WOZJEWJENJA

njedźelu, 12. julija 2015

Putnikowanje dźěci do Różanta

Dźěci ze wšitkich serbskich wosadow su srjedu, 15. julija, na putnikowanje do Różanta přeprašene. Lětuše hesło je „Božo, zahor nas kaž Don Boska“. Boža mša započnje so w 10.30 hodź. w hnadownej cyrkwi. Po mjezyprogramje so putnikowanje z nyšporom w 13.00 hodź. zakónči.

Wulět serbskeje młodžiny

Wulět serbskeje dekanatneje młodžiny budže njedźelu, 13. septembra, a powjedže do Błótow. Nadrobnošće so hišće wozjewja.

Pytaja młodžinskeho referenta

Za dekanatne dušepastyrstwo młodžiny we Worklecach ma so 1. oktobra referent respektiwne referentka ze socialnopedagogiskej abo teologiskej kwalifikaciju přistajić. Wuměńjenja su dobre znajomosće w młodžinskim abo kubłanskim dźěle, wobknježenje serbskeje rěče, zwólniwosć, tež wječor abo kónc tydženja dźělać a přezjednosć z nadawkom, službu a žiwjenjom katolskeje cyrkwe. Dźělowe městno je w Don Boskowym domje we Worklecach. Zrěčenje je na dvě lěće wobmjezowane. Pisomne požadanja přijimuje hač do pjatka, 24. julija, biskopski ordinariat, personalny wotrjad, Käthe-Kollwitz-Ufer 84, 01309 Drježdźany abo z mailku na bewerbung@ordinariat-dresden.de. Štóž ma prašenja, njech zazwoni na młodžinskeho dušepastyrja biskopstwa, fararja Ralpha Kochinku, telefonowe čisło (03 51) 3 36 47 16.

Pytaja zahoritych hudźbnikow

Za nowu jazzowu, rockowu a popowu kapalu pyta Budyski Serbski ludowy ansambl (SLA) młodych zahoritych hudźbnikow. Štóž swój instrument derje wobkneži a ma lóšt, z druhimi młodostnymi pod profesionelnym nawodom hudźić, je namołwjeny sobu činić. Wuměłski nawod změje wuspěšny jazzowy pozawnist Michael Winkler z Drježdźan. Hakle lětsa je wón spěchowanske jazzowe myto Mjezynarodneho Dixieland festivala Drježdźany 2015 dóstał. Proby maja so wot oktobra tydžensce wotměwać. Zajimcy njech so pola Symana Hejduški w SLA pak pod telefonowym čisłom (0 35 91) 35 81 31 abo z mailku pod praktikant@sne-gmbh.com přizjewja. Přenja proba k zeznajomnjenju budže sobotu, 18. julija, w rumnosćach SLA w Budyšinje.

